

आकाशवाणी जयपुर-अजमेर
प्रादेशिक समाचार
दिनांक 22.09.2024 समय: 18.45 बजे

- अमरीका भारत सूं चुराई 297 कलाकृतियां ने लौटाबा रो फैसलो कर्यो।
- राज्यपाल हरिभाऊ बागडे कया-शिक्षा राष्ट्र निर्माण मांय महताऊ भूमिका निभावे है।
- जैसलमेर जिला मांय आज 6 चुण्योडी ठोडां माथे एक घंटा मांय 5 लाख पौधा लगाया गया।
- प्रदेश मांय बारिश रो दौर रूकबा सूं दिन रा तापमान मांय बढ़ोतरी जारी।

000

अमरीका भारत सूं चुराई गई दौ सौ 97 कलाकृतियां ने लौटाबा रो फैसलो कर्यो है। ये कलाकृतियां बेगी ही भारत भेजी जावेला। प्रधानमंत्री इण कलाकृतियां ने लौटाबा खातर राष्ट्रपति बाइडेन रो धन्यवाद कर्यो है। श्री मोदी कया के ये चीजां केवल भारत री ऐतिहासिक संस्कृति अर सभ्यता रो आधार हैं। घनिष्ठ द्विपक्षीय अर सांस्कृतिक संबंधां ने और मजबूत बणबा खातर जून 2023 मांय जारी कर्या गया संयुक्त बयान रे मुजब अमरीकी विदेश विभाग रा ब्यूरो ऑफ एजुकेशनल एन्ड कल्चरल अफेयर्स अर भारत सरकार रा संस्कृति मंत्रालय रे तैत आबा वाळा भारतीय पुरातत्व सर्वेक्षण राष्ट्रपति बाइडेन अर प्रधानमंत्री मोदी कानी ऊं सांस्कृतिक धरोहर रा संरक्षण खातर सहयोग बढ़ाबा री वचनबद्धता ने पूरो करबा खातर जुलाई 2024 मांय एक सांस्कृतिक संपदा समझौता माथे दस्तखत कर्या हा। इण मांय बत्ती कलाकृतियां पूर्वी भारत री टैराकोटा सूं बणी है, जदके बाकी कलाकृतियां पत्थर, धातु, लकड़ी अर हाथी दांत सूं बणी हैं, ज्यां रो संबंध देश रा न्यारा भागां सूं है।

000

चार दिन रो वर्ल्ड फूड इंडिया 2024 आज पूरो व्ह्यो। इण री सरूआत नई दिल्ली रा भारत मंडपम मांय 19 सितम्बर ने व्ही ही। इण आयोजन मांय देश रा न्यारा न्यारा राज्यां अर केन्द्रशासित प्रदेशां रे अलावा करीब 90 देशां रा नुमाइंदा भाग लीना। 18 केंद्रीय मंत्रालय अर सहयोगी सरकारी निकाय भी इण मांय भाग लीनो। इण कार्यक्रम मांय खाद्य प्रसंस्करण मांय वैश्विक महाशक्ति रा रूप मांय भारत ने न्यारी पिछाण बणई है। यो कार्यक्रम खाद्य प्रसंस्करण हलका मांय नवाचार, प्रौद्योगिकी अर स्थिरता रो संगम रह्यो।

000

भारतीय संसद काल सूं नई दिल्ली मांय सरू व्हे रह्या दो दिन रा 10वां राष्ट्रमंडल संसदीय संघ-सीपीए भारत क्षेत्र सम्मेलन री मेजबानी करेला। सम्मेलन री अगुवाई लोकसभा अध्यक्ष ओम बिरला करेला। लोकसभा अध्यक्ष बिरला सीपीए भारत क्षेत्र रा अध्यक्ष भी है। सम्मेलन सूं पैली सीपीए भारत क्षेत्र कार्यकारी समिति री बैठक व्हेली। सम्मेलन रो विषय सतत और समावेशी विकास मांय विधायी समितियां री भूमिका है।

000

अजमेर रा महर्षि दयानंद सरस्वती विश्वविद्यालय मांय आज अखिल भारतीय राष्ट्रीय शैक्षिक महासंघ कानी ऊं शिक्षक सम्मेलन राख्यो गयो। सम्मेलन ने संबोधित करता थकां राज्यपाल हरिभाऊ बागडे कया के शिक्षा राष्ट्र निर्माण मांय महताऊ भूमिका निभावे है। आपरी मां अर परिवार सूं मिली शिक्षा सूं टाबर छोटी उमर मांय ही केई खास बातां सीख लेवे है। शिक्षक ने विद्यार्थियां रा समूचा विकास ने ध्यान मांय राख र पढ़ाणो चाहिजे। इण सूं विद्यार्थी अपरा जीवन

मांय तरक्की करेला। राज्यपाल कया के श्री माधव सदाशिव गोलवकर 'गुरुजी' रा विचारां माथे नुवी शिक्षा नीति माथे जोर देवणो चाहिजे।

शिक्षा मांय सुधार खातर बणी नीतियां, शिक्षा आयोग अर कमेटियां रा सुझाव रो असर प्राथमिक शिक्षा माथे होबा सूं पढणियां मांय राष्ट्र प्रथम रो भाव जागेला। भारतीय शिक्षा पद्धति मांय म्हाकी संस्कृति, देवधर्म अर आदर्शां रा आचरण ने ठोर देणी चाहिजे।

000

मुख्यमंत्री भजनलाल शर्मा कया के गलती होणो स्वाभाविक है पण गलती ने मानता थकां माफी मांग लेणो बड़ी बात है अर सामे वाळो उण रे माफ कर देवे या उण सूं भी बड़ी बात है। वे कया के क्षमा मांगबा सूं बैरभाव खतम हो जावे है अर समाज मांय शांति अर सद्भाव रो रास्तो खुले है। श्री शर्मा आज जयपुर मांय राजस्थान जैन सभा री कानी ऊं राख्या 'सामूहिक क्षमापन पर्व समारोह' ने संबोधित कर रिया हा। वे कया के जैन धर्म री सत्य, अहिंसा, अपरिग्रह, ब्रह्मचर्य अर अस्तेय री शिक्षावां आज रा युग मांय भी प्रासंगिक हैं। कार्यक्रम मांय मुनि श्री शशांक सागर, पावन सागर अर समत्व सागर महाराज समेत केई धर्म गुरु मौजूद रिया। समारोह मांय जयपुर सांसद मंजू शर्मा, विधायक कालीचरण सराफ, राजस्थान जैन सभा रा अध्यक्ष सुभाष चंद जैन समेत बड़ी संख्या मांय जैन समाज रा लोग भी शामिल व्हा।

000

प्रधानमंत्री नरेन्द्र मोदी रा तीसरा कार्यकाल मांय 100 दिन मांय कर्या गया महताऊ कामां रा बारा मांय जानकारी देबा सारू आकाशवाणी जयपुर रा प्रादेशिक समाचार बुलेटिन मांय खास कड़ी चलाई जा री है। आज म्हे थाने सरकार कानी लोगां रा बेहतर स्वास्थ्य सेवावां रो फायदो लेबा सारू बड़ा फैसला रा बारा मांय बता रह्या है। देशभर मांय लागू करी गई आयुष्मान भारत योजना एक बड़ो कार्यक्रम है। या योजना आज देश रा करोडो लोगां रा सहज जीवण रो आधार बणी व्ही है। इण रे तैत 5 लाख रूपया तांई रा ईलाज रो खर्च केन्द्र सरकार उठा री है। इण योजना रे तैत 70 बरस या उण सूं बत्ती उम्र रा सगळा नागरिकां ने मुफ्त स्वास्थ्य कवरेज दियो जावेला। 70 बरस सूं बत्ती उम्र रा गरीब लोगां ने वां ने वा रा कार्ड रे अलावा 5 लाख रूपया तांई रो न्यारो कवरेज भी दियो जावेला। इण सूं कोई 4 करोड परिवारां रा 6 करोड बुजुर्गां ने इण रो फायदो मिलेला। खास बात या है के इणयोजना रो फायदो लेबा खातर उमर री कोई सीमा नी राखी गई है।

0000

प्रदेश रा सीमाडेरा जिला जैसलमेर ने हरयो-भरयो करबा रा लगस सूं आज एक घंटा मांय पांच लाख पौधा लगाया गया। पर्यावरण संरक्षण सूं जुड्या इण अभियान रे तैत जिला री छह चयनित ठोडां माथे ये पौधा लगाया गया। बत्ती जाणकारी म्हारा खबरनवीस सूं-

000

दौसा जिला मांय नव साक्षरां खातर घणो उच्छाव है। नव भारत साक्षरता कार्यक्रम रे तैत परीक्षा राखी गई। जिला मांय 299 परीक्षा केन्द्रां माथे करीब 15 हजार पढणिया साक्षरता री परीक्षा दी। परीक्षा देबा महिलाबा ग्रामीण परिवेश मांय गीत गाता थकां परीक्षा केन्द्र पूगी। दौसा ब्लॉक रा साक्षरता समन्वयक विकास तिवाडी बताया के ब्लॉक मांय करीब 2 हजार परीक्षार्थी शामिल व्हा।

000

प्रदेश मां बारिश रो दौर रूकबा रे पाछे बत्ती ठोडां माथे तापमान मांय बढोतरी व्ही है। वटी ने सुंवारे अर रात ने हल्की ठंड रो अहसास व्हे रियो है। इण बीच, लारला 24 घंटां मांय कुछेक ठोडां माथे हल्को मेह बरस्यो। उदयपुर अर जोधपुर मांय कठे-कठे मेह बरस्यो। प्रदेश रा शहरां

मांय पारा मांय एक सू तीन डिग्री सेल्सियस ताई री बढोतरी व्ही है। टोंक अर सवाईमाधोपुर जिला मांय आज मौसम साफ रह्यो। मौसम केन्द्र जयपुर रे मुजब आवता दो दिन पश्चिमी राजस्थान मांय केई ठोडां माथे मौसम साफ रहवेला। वठी ने पूर्वी राजस्थान मांय हल्को मेह बरस सके है।

000

प्रदेश मांय न्यारी-न्यारी ठोडां व्ह्या हादसां मांय तीन लोगां री मौत व्हेगी। सांचौर जिला रा रानीवाड़ा तहसील रा दर्ईपुर गांव मांय बिजली रो करंट लागबा सू सगा भाई-बहिन री मौत व्हेगी।

वठी ने चित्तौडगढ जिला रा निम्बाहेडा-छोटी सादडी मारग माथे शनिवार देर रात दो गाडियां री टक्कर पाछे लागी आग मांय झुलसर एक जणा री मौत व्हेगी अर एक दूजो जणो घायल व्हे ग्यो। घायल ने इलाज खातर उदयपुर भेज्यो ग्यो। सवाईमाधोपुर जिला रा बाँली थाना हलका रा लाखनपुर घाटी मांय एक जीप रे पलट जाबा सू 16 लोग घायल व्हे ग्या। ये सगळा एक कार्यक्रम मांय शामिल होबा खिरनी गांव जा रिया हा।

000

सवाईमाधोपुर जिला रा जान्या मान्या रणथम्भौर बाघ परियोजना हलका रा खण्डार रेंज मांय एक बाघ री मौत व्हे ग्यी। यो बाघ टी-2312 आपरा हलका माथे कब्जा खातर दूजा बाघ सू लड़ाई मांय घायल व्हे ग्यो हो। मृत बाघ रो पोस्टमार्टम कर अंतिम संस्कार कर दियो गयो।

000

जोधपुर एम्स रा आहार विज्ञान विभाग री कानी ऊं पोषण माह रे तैत केई कार्यक्रम राख्या जा रह्या है। पोषण सू जुड्या सगळी जरूरी चीजां ने शामिल करता थकां समग्र पोषण विषय माथे काल प्रदर्शनी लगाई गई। जिण मांय गर्भाधान सू लेर बुढापा ताई सगळी उमर रा लोगां खातर स्वस्थ आहार संबंधी आदतां ने बढावो देबा वाळा खातर जानकारी दी गई।

000

प्रधानमंत्री नरेन्द्र मोदी आवता दीतवार ने आकाशवाणी रा 'मन की बात' कार्यक्रम मांय आपरा विचार साझा करेला। या इण मासिक रेडियो कार्यक्रम री 114वीं कड़ी व्हेला। श्रोता, इण महीना री 27 तारीख ताई टोल फ्री नम्बर 1 8 0 0 - 1 1 - 7 8 0 0 माथे कार्यक्रम खातर सुझाव भेज सके है। इण रे अलावा 1922 माथे मिस्ड कॉल देर एस एम एस माथे लिंक मांय भी सुझाव भेज सके है। इण रे अलावा नरेंद्र मोदी एप या माई जीओवी ओपन फोरम रे जरिये ऑनलाइन भी सुझाव दिया जा सके है।

000